

江西詩徵

江西詩微卷三

南城曾煥寶谷編輯

唐

袁皓

皓字退山宜春人登咸通進士第任撫吉二州刺史僖宗狩蜀擢倉部員外郎龍紀中爲集賢殿圖書使出採訪圖書著碧池書三十卷自稱碧池處士

重歸宜春偶成十六韵寄朝中知己

水香甘似醴知是入袁溪黃竹成叢密青蘿夾岸低煖流  
鴻鴈戲深樹鷓鴣啼黃犬驚迎客青牛困臥泥有村皆續

紡無地不耕犁鄉曲多耆舊逢迎盡杖藜殷勤傾白酒相  
勸有黃鷄歸老官知忝還鄉路不迷直言干忌諱權路耻  
依棲拙學趨時態閑思與牧齊稻蠟饒燕雀江海溢鳬鷺  
昔共遊離亂今來息鼓鞞恩仁霑品物教化及雕題上貢  
貞元祿會叨寵記批何須歸紫禁便是到丹梯珍重長安  
道從今息馬嘶

重歸宜春經過萍川題梵林寺

梵林遺址在松蘿四十年來兩度過瀘水東奔彭蠡浪萍  
川西注洞庭波村煙不改居人換官路無窮行客多拖紫  
腰金成底事凭闌惆悵欲如何

來鵲

鵠豫章人詩思清麗咸通中舉進士不第著有來

公集

按全唐詩鵠一作鵬通志內分作兩人文獻通考止載有來鵬集無來鵠當是一人誤爲

兩人也

聖政紀頌

并序

穆宗皇帝臨大朝與羣臣言奏政事羣臣退而宰臣奏曰陛下問及乎政事此三皇五帝之所徽美也陛下不問及史臣此三皇五帝之所弭已也徽美者將有乎聞也弭已者將有乎亡也以聞之而又亡之則陛下徒有宵衣旰食之名規天條地之績與羣臣言後若颺然拂冠過冕湮時銷日無得用於後譬如十夫樹楊一夫拔之無得以成其大

也政事羣臣得陛下日間之是十夫樹楊也史官  
執筆爲陛下日遠之是一夫拔楊也使後之人訝  
聖朝空晨虛夕閑殿曠廷無君臣咨謀洋溢之言  
乏社稷安危強讜之說是不亦遠史臣致不載其  
事如拔去其楊將弭已之謂乎臣伏念貞觀永徽  
之代百官之有耳目但聽視天子而已故言事者  
安論紆詞無疑權慮勢史官執筆於階之下天子  
側旒於殿之上奏者發誠於廷之中是以正衙一  
開則臣誠前而啟之帝旒近而鎮之史筆隨而錄  
之由是君臣謀國圖政之事俞機都要之言詫業  
發神豐編照物偕籍於堯典差光於天陽至今見

太宗文德若三皇五帝之所徽美也自永徽之後  
宰執不正窺伺是忌針棘前後阻越對敷狼噬虎  
食持膏銜肉蓋以言多爲已曾不致君內廷失中  
畏使人聽乃奏史官與百僚俱退然後宰臣請事  
由是君有問而宰臣知之史官不得與於聞君有  
舉而宰臣謀之史官不得記其事次第周行檢錄  
制誥與冗吏同工而已臣嘗涕泣以歎豈有以一  
己之細一性之忌於黍稷圭景之間苟嗜急須廵  
天遮上使聖緒神績嘉敷善諷罔得聞於千萬年  
枉有謂明朝空晨虛夕閑殿曠廷無君臣咨謀洋  
溢之言乏社稷安危強讜之說若今踵而承之則

不唯臣有障聰蔽睿之刺抑陛下雖有三皇五帝之所徽美而若遠史臣則三皇五帝之所弭已也抑又有一夫拔楊之謂歟臣請史官執筆當羣臣奏事隨日撰錄號爲聖政紀臣立朝荷祿幸甚穆宗皇帝動展領旒憮然歎曰吁朕罔敢粉名厥後乃罔知厥後然聖人存簡策者亦非以粉名也蓋存乎大國之典鴻祖之業我國有典我祖有業業在於典典在於史曷厥史不書是尸余於祖涸業於典也朕纘承聖緒恭惟恪思將念厥政未嘗不離安廢酣馳荒驚遠是以每與宰臣言如簇天下一巡省每見宰臣退而展天下盡聞知豈圖臣蓄

猾謀公無同事欲弄尾舌先衛巖穴隔斥史臣占  
佞明后致懿搜嘉訪不存堯典之書善諷名猷莫  
出清廟之什史臣負我不舉其官宰輔盡忠厥聞  
有此由是詔史職執史筆立於廷之下錄君臣臚  
句之必行載剛毅進退之敢議題其篇目曰聖政  
紀也至上之卽位三年有鄉校小臣來鵠居山澤  
間常私心重惜史臣以其史臣者是當國之鏡千  
億代之眉目也因窺穆宗實錄得解憤釋嫉於立  
史官爲聖政紀者追而誦出其事以鑒今之廷列  
故拜獻頌曰

三皇不書五帝不紀有聖有神風銷日已何教何師生來



死止無典無法頑肩鼻比三皇實作五帝實治成天造地  
不昏不圯言得非排文得聖齒表表如見者莫若乎史是  
知朴繩休結正簡斯若君誥臣箴觚編毫絡前書後經規  
善鑒惡國之大章如何寢畧嗚呼貞觀多呼永徽多俞廷  
日發論殿日發謨牙孽不作鳥鼠不除論出不蓋謨行不  
紆楹然史臣蛇然史裾瞠瞠而視透透而窺翹筆當面決  
防納污不枯爾智不息我愚執言直注史文直敷故得粲  
粲朝典落落廷簪聖牘旣多堯風不淺頌編坦軸君出臣  
顯若儼見旒若俯見冕無閑殿曠廷無尸安素宴三皇不  
亡五帝不翦太宗得之史焉斯展暨乎後相圖身天子專  
問我獨以言史不得近邱明見嫌倚相在擯秉筆如今隨

班不進班退史歸惘然疇依奏問莫覩嘉謨固稀取彼諧  
命祿爲國肥炯哉時皇言必成章德宣五帝道與三皇如  
何翌臣曉肉嗜益背距磨挾楯衡拘長控截僚位占護陽  
光垣私藩已遠史度唐俾德音嘉訪默縮暗亡咽典噤法  
蓋聖籠昌梏以致此史文不張後必非笑將來否臧謂乎  
殿空展逸朝憎廷荒不知姦蔽文失汪洋有貞觀業有永  
徽綱亦匿匪見亦寢匪彰賴有後臣斯言不佞伊尹直心  
太甲須聖事既可書史何不命乃具前欺大陳不敬曰逐  
史之喻請以物竝且十夫樹楊一夫欲競裁旣未牢捫豈  
能盛帝業似裁逐史似捫穆宗憮然若疚若營昔何臣斯  
隱我祖正不傳親問不寫密諍孰示來朝以光神政由是

天呼震吸徵奔名急史題筆來叱廷而入端耳抗目不撓  
不挹獬豸側頭螭蚪擺溼握管絕怡當殿而立君也盡問  
臣也倒誠磊磊其事鏗鏘其聲大何不顯細何不明語未  
絕緒史已錄成謂之何書以政紀名伊紀清芬可昭典墳  
古師官烏背聖官雲方之我后錄里書分錄有君法書有  
君文君法君文在聖政紀云殿無閑時廷無曠日雲譏波  
訪倦編刊筆君劬臣勞上討下述惟勤惟明在聖政紀出  
至德何比至教焉如孰窺孰測外夷內儲謂君有道乎臣  
有謨歟有道有謨在聖政紀書一體列秩同力與戴祈福  
去邪絕防無礙國章可披唐文可愛善咨不偷嘉論不蓋  
不偷不蓋在聖政紀載諒夫總斯不朽可懸魏闕愚得是

言非訕非伐實謂醫臣渾沌開君日月妖物霧死天文光  
發惟我之有頌分奚斯躍而董狐歷

宛陵送李明府罷任歸江州

菊花村晚雁來天共把離觴向水邊官滿便尋垂釣侶家  
貧已用賣琴錢浪生湓浦千層雪雲起爐峰一炷煙倘見  
吾鄉舊知己爲言顚顚過年年

清明與友人遊玉粒塘莊

幾宿春山逐陸郎清明時節好煙光歸穿細荇船頭滑醉  
踏殘花殷齒香風急嶺雲飄迴野雨餘田水落方塘不堪  
吟罷東回首滿耳蛙聲正夕陽

寒食山館書情

獨把一杯山館中每經時節恨飄蓬  
侵堦草色連朝雨滿地梨花昨夜風  
蜀魄啼來春寂寞楚魂吟後月朦朧  
分明記得還家夢徐孺宅前湖水東

病起

春初一臥到秋深不見紅芳與綠陰  
窗下展書難久讀池邊扶杖欲閑吟  
藕從平地生荷葉笋過東家作竹林  
在舍渾如遠鄉客詩僧酒伴鎮相尋

鄂渚清明日與鄉友登頭陀山

冷酒一杯相勸頻異鄉相遇轉相親  
落花風裏數聲笛芳草煙中無限人  
都大此時深悵望豈堪高處更逡巡  
思量費子眞仙子不作頭陀山下塵

題廬山雙劍峯

倚天雙劍古今閑三尺高於四面山  
若使火雲燒得動始應農器滿人間

雲

千形萬象竟還空映水藏山片復重  
無限旱苗枯欲盡悠悠閑處作奇峯

鄂渚除夜書懷

鸚鵡洲頭夜泊船此時形影共淒然  
難歸故國干戈後欲告何人雨雪天  
筇撥冷灰書悶字枕陪寒席帶愁眠  
自嗟落魄無成事明日春風又一年

鷺鷥

裏絲翹足傍澄瀾消盡年光佇思間若使見魚無美意向  
人姿態更應閑

子規

雨恨花愁同此冤啼時聞處正春繁千聲萬血誰哀爾爭  
得如花笑不言

新安官舍閑坐

寂寞空階草亂生簾涼風動若爲情不知獨坐閑多少看  
得蜘蛛結網成

游魚

芙蓉隈荇思夷猶掉尾揚鬚逐慢流應怕碧巖巖下水浮  
藤如線月如鉤

偶題

近來靈鵲語何疎  
獨凭欄干恨有殊  
一夜綠荷霜剪破  
賺他秋雨不成珠

鄭啓

啓宜春人谷之兄

嚴塘經亂書事

塵生宮闕霧濛濛  
萬騎飛龍幸蜀中  
在野傳嚴君不夢  
乘軒衛懿鶴何功  
雖知四海同盟久  
未合中原武備空  
星落夜原妖氣滿  
漢家麟閣待英雄

梁園皓色月如珪  
清景傷時一慘悽  
未見山前歸牧馬  
猶聞江上帶征鞞  
爲魚隊潛鱗困  
鶴處雞羣病翅低  
正是



四郊多壘日波濤早晚靜鯨鯢

鄧表山

白日三清此上時觀開山下彩雲飛仙壇丹竈靈猶在鶴  
駕清朝去不歸晉末幾遷陵谷改塵中空換子孫非松花  
落盡無消息半夜疎鐘徹翠微

鄭谷

谷字守愚宜春人光啓三年擢第官右拾遺歷都  
官郎中幼卽能詩名盛唐末有雲臺編宜陽集外  
集各三卷

感興

禾黍不陽豔競栽桃李春翻令力耕者半作賣花人

望湘亭

湘水似伊水湘人非故人登臨獨無語風柳自搖春

別同志

所立共寒苦平生同與遊相看臨遠水獨自上孤舟天澹  
滄浪晚風悲蘭杜秋前程吟此景爲子上高樓

送進士盧肇東歸

灞岸草萋萋離觴我獨攜流年俱老大失意又東西曉楚  
山雲滿春吳水樹低到家梅雨歇猶有子規啼

祕閣伴直

祕閣鎖書深牆南列晚岑吏人同野鹿庭木似山林淺井  
寒蕪入迴廊疊蘚侵閑看薛稷鶴共起五湖心

送太學顏

一作時

明經及第東歸

平楚干戈後田園失耜耕艱難登一第離亂省諸兄樹沒  
春江漲人繁野渡晴閑來思學館猶夢雪窗明

送人之九江謁郡侯苗員外紳

澤國尋知己南浮不偶遊湓城分楚塞廬岳對江州曉飯  
臨孤嶼春帆入亂流雙旌相望處月白庾公樓

贈別

南遊曾共遊相別倍相留行色迴燈曉離聲滿竹秋穩眠  
彭蠡浪好醉岳陽樓明日逢佳景爲君成白頭

訪姨兄王斌渭口別墅

枯桑河上村寥落舊田園少小曾來此悲涼不可言訪鄰

多指塚間路半移原久歎家僮散初晴野薺繁客帆懸極  
浦漁網颺危軒苦澀詩盈篋荒唐酒滿尊高枝霜果在幽  
渚暝禽喧遠靄籠樵響微煙起燒痕衰榮孤族分感激外  
兄恩三宿忘歸去圭峰恰對門

訪題進士張喬延興門外所居

平生苦節同旦夕會原東掩卷斜陽裏看山落木中星霜  
今欲老江海業全空近日文場內因君起古風

寄南浦謫官

多才翻得罪天末抱窮憂白首爲遷客青山繞萬州醉敲  
梅障曉歌厭竹枝秋望闕懷鄉淚荆江水共流

寄前水部賈員外嵩

謝病別文昌仙舟向越鄉貴爲金馬客雅稱水曹郎白鷺  
同孤潔清波共渺茫相如詞賦外騷雅趣何長

寄基客

松窗楸局穩相顧思皆凝幾局賭山果一先饒海僧覆圖  
聞夜雨下子對秋燈何日無羈束期君向杜陵

長安夜坐寄懷湖外嵇處士

萬里念江海浩然天地秋風高羣木落夜久數星流鐘絕  
分宮漏螢微隔御溝遙思洞庭上葦露滴漁舟

久不得張喬消息

天末去程孤沿淮復向吳亂離何處甚安穩到家無樹盡  
雲垂野檣稀月滿湖傷心繞村落應少舊耕夫

趙璘郎中席上賦蝴蝶

尋豔復尋香似閑還似忙  
暖煙沈蕙徑微雨宿花房  
書幌輕隨夢歌樓誤採粧  
王孫深屬意繡入舞衣裳

登杭州城

漠漠江天外登臨返照間  
潮來無別浦木落見他山  
沙鳥晴飛遠漁人夜唱閑  
歲窮歸未得心逐片帆還

潼關道中

白道曉霜迷離燈照馬嘶  
秋風滿關樹殘月隔河雞  
來往非無倦窮通豈易齊  
何年歸故社披雨翦春畦

池上

池榭愜幽獨狂吟學解嘲  
露荷香自在風竹冷相敲  
喪志

嫌孤宦忘機愛澹交仙山如有分必擬訪三茅

江行

漂泊病難任逢人淚滿襟關東多事日天末未歸心夜雨  
荆江漲春雲郢樹深殷勤聽漁唱漸次入吳音

水軒

日日狎沙禽偷安且放吟讀書老不入愛酒病還深歉後  
爲羈客兵餘問故林楊花滿牀席搔首度春陰

張谷田舍

縣官清且儉深谷有人家一徑入寒竹小橋穿野花碓喧  
春澗滿梯倚綠桑斜日說年來稔前村酒可賒

深居

吾道有誰同  
深居自固窮  
殷勤謝綠樹  
朝夕惠清風  
書滿寒窗下  
琴橫野艇中  
年來頭更白  
雅稱釣魚翁

端居

葉葉下高梧  
端居失所圖  
亂離詩輩少  
風月夜吟孤  
舊疾衰還有  
窮愁醉暫無  
秋光如水國  
不語理霜鬚

郊園

相近復相尋  
山僧與水禽  
煙蓑春酌靜  
雪屋夜碁深  
雅道誰開口  
時風未醒心  
溪光何以報  
祇有醉和吟

旅寓洛南村舍

村落清明近  
鞦韆稚女誇  
春陰妨柳絮  
月黑見梨花  
白鳥窺魚網  
青帘認酒家  
幽棲雖自適  
交友在京華



杏花

不學梅欺雪。輕紅照碧池。小桃新謝後。雙燕却來時。香屬  
登龍客。煙籠宿蝶枝。臨軒須貌取。風雨易離披。

夕陽

夕陽秋更好。歛歛蕙蘭中。極浦明殘雨。長天急遠鴻。僧窗  
留半榻。漁舸透疎篷。莫恨清光盡。寒蟾卽照空。

搖落

夜來搖落悲桑棗。半空枝故國無消息。流年有亂離。霜秦  
聞雁早。煙渭認帆遲。日暮寒聲急。邊軍在雍岐。

京兆府試殘月如新月

榮落何相似。初終却一般。猶疑和夕照。誰信墮朝寒。水木

輝華別詩家比象難佳人應誤拜棲鳥反求安屈指期輪  
滿何心謂影殘庾樓清賞處吟徹曙鐘看

叙事感恩上狄右丞

昔歲曾投贊關河在左馮庾公垂顧遇王粲許從容頃年

事崇出守同州右丞在幕席谷退飛遊謁始受獎知首薦叨殊禮全家寓近封白樓

陪寫望青眼感遭逢顧念梁間燕深憐澗底松嵐光蓮嶽

逼酒味菊花濃

同州官醢尚菊花酒

寇難旋移國漂離幾聽蛩半生

悲逆旅二紀間門墉蜀雪隨僧蹋荆煙逐雁衝凋零歸兩

髻舉止失前蹤得事雖甘晚陳詩未肯慵邇來趨九仞又

伴賞三峯

時大駕在華州

棲託情何限吹噓意數重自茲儔侶內

無復歎龍鍾

乾符丙申歲奉試春漲曲江池

王澤尙通津恩波此日新  
深疑一夜雨宛似五湖春  
泛濫翹振鷺澄清躍紫鱗  
翠低孤嶼柳香失半汀  
蘋鳳輦尋佳境龍舟命近臣  
桂花如入手願作從遊人

迴鑾

妖星沈雨露和氣滿京關  
上將忠勲立明君法駕還  
順風調雅樂夾道序羣班  
香泛傳宣裏塵清指顧間  
樓臺新紫氣雲物舊黃山  
曉渭行朝肅秋郊曠望閑  
廟靈安國步日角動天顏  
浩浩昇平曲流歌徹百蠻

貧女吟

塵壓鴛鴦廢錦機  
滿頭空插麗春枝  
東鄰舞妓多金翠  
笑

翦燈花學畫眉

席上貽歌者

花月樓臺近九衢清歌一曲倒金壺座中亦有江南客莫  
向春風唱鷓鴣

十日菊

節去蜂愁蝶不知曉庭還繞折殘枝自緣今日人心別未  
必秋香一夜衰

曲江春草

花落江堤簇暖煙雨餘草色遠相連香輪莫輟青青破留  
與愁人一醉眠

雪中偶題

亂飄僧舍茶煙溼密灑歌樓酒力微江上晚來堪畫處漁人披得一蓑歸

淮上與友人別

揚子江頭楊柳春楊花愁殺渡江人數聲風笛離亭晚君向瀟湘我向秦

淮上漁者

白頭波上白頭翁家逐船移浦浦風一尺鱸魚新釣得兒孫吹火荻花中

七祖院小山

小巧功成雨蘚斑軒車日日扣松關峩嵒咫尺無人去却向僧窗看假山

悶題

莫厭九衢塵土間  
秋晴滿眼是南山  
僧家未必全無事  
道著訪僧心且閑

重訪黃神谷策禪者

初塵芸閣辭禪閣  
却訪支郎是老郎  
我趣轉卑師趣靜  
數峰秋雪一鑪香

別修覺寺無木上人

松上閑雲石上苔  
自嫌歸去夕陽催  
山門握手無他語  
祇約今冬看雪來

傳經院壁畫松

危根瘦盡聳孤峰  
珍重江僧好筆蹤  
得向遊人多處畫  
却

勝澗底作眞松

越鳥

背霜南雁不到處倚櫂北人初聽時梅雨滿江春草歇一  
聲聲在荔枝枝

黃鶯

春雲薄薄日輝輝宮樹煙深隔水飛應爲能歌繫仙籍麻  
姑乞與女眞衣

苔錢

春紅秋紫繞池臺箇箇圓如濟世財雨後無端滿窮巷買  
花不得買愁來

蓮葉

移舟水濺差差綠倚檻風搖柄柄香多謝浣溪人不折雨  
中留得蓋鴛鴦

早入監院

玉階春冷未催班暫拂塵衣就笏眠孤立小心還自笑夢  
魂潛繞御鑪煙

紫雲重疊抱春城廊下人稀唱漏聲偷得微吟斜倚柱滿  
衣花露聽宮鶯

忝官諫垣明日轉對

吾君英睿相君賢其那寰區未晏然明日翠華春殿下不  
知何語可聞天

再經南陽



平蕪漠漠失樓臺。昔日遊人亂後來。寥落牆匡春欲暮。燒殘宮樹有花開。

次韻和禮部盧侍郎江上秋夕寓懷

盧郎到處覺風生。蜀郡留連亞相情。時中儀在瀘州恩門大夫待遇優厚亂後江山悲庾信。夜來煙月屬袁宏。夢歸蘭省寒星動。吟向莎洲宿鷺驚。未脫白衣頭半白。叨陪屬和倍爲榮。

渚宮亂後作

鄉人來話亂離情。淚滴殘陽問楚荆。白社已應無故老。清江依舊繞空城。高秋軍旅齊山樹。昔日漁家是野營。牢落故居灰燼後。黃花紫蔓上牆生。

鷓鴣

暖戲煙蕪錦翼齊。品流應得近山鷄。雨昏青草湖邊過。花落黃陵廟裏啼。遊子乍聞征袖溼。佳人纔唱翠眉低。相呼相應湘江濶。苦竹叢深春日西。

燕

年去年來來去忙。春寒煙暝渡瀟湘。低飛綠岸和梅雨。亂入紅樓棟杏梁。閑几硯中窺水淺。落花徑裏得泥香。千言萬語無人會。又逐流鶯過短牆。

水

竹院松廊分數派。不空清泚亦逶迤。落花相逐去何處。幽鷺獨來無限時。洗鉢老僧臨岸久。釣魚閑客捲綸遲。晚晴一片連莎綠。悔與滄浪有舊期。

海棠

春風用意勻顏色銷得攜觴與賦詩穠麗最宜新著雨嬌  
嬈全在欲開時莫愁粉黛臨窗嬾梁廣丹青點筆遲朝醉  
暮吟看不足羨他蝴蝶宿深枝

燈

雨向莎階滴未休冷光孤恨雨悠悠船中聞雁洞庭宿牀  
下有蛩長信秋背照翠簾新灑別不挑紅燼正含愁蕭瑟  
寒竹南窗靜一局閑棋爲爾留

闕下春日

建章宮殿紫雲飄春漏遲遲下絳霄綺陌暖風嘶去馬粉  
廊初日照趨朝花經宿雨香離却拾鶯在豪家語更嬌秦楚

年年有離別揚鞭揮袖灞陵橋

次韻和秀上人長安寺居言懷寄渚宮禪者

舊齋松老別多年香社人稀喪亂間  
出寺祇知趨內殿閉門長似在深山  
卧聽秦樹秋鐘斷吟想荊州夕鳥還  
唯恐興來飛錫去老郎無路更追攀

蜀中春日

海棠風外獨霑巾襟袖無端惹蜀塵  
和暖又逢挑菜日寂寞未是探花人  
不嫌蟻酒衝愁肺却憶漁蓑覆病身  
何事晚來微雨後錦江春學曲江春

遊蜀

所向明知是暗投兩行清淚語前流  
雲橫新塞遮秦甸花

落空山入閩州不忿黃鸝驚曉夢唯應杜宇信春愁梅黃  
麥綠無歸處可得漂漂愛浪遊

峽中嘗茶

簇簇新英摘露光小江園裏火煎嘗吳僧謾說鴉山好蜀  
叟休誇鳥觜香合座半甌輕泛綠開纖數片淺含黃鹿門  
病客不歸去酒渴更知春味長

輦下冬暮詠懷

覓句千名祇自勞苦吟殊未補風騷煙開水國花期近雪  
滿長安酒價高舊業已荒青謁巡寒江空憶白雲濤不知  
春到情何限惟恐流年損鬢毛

蜀中三首

馬頭春向鹿頭關，遠樹平蕪一望閑。  
雪下文君沽酒市，雲藏李白讀書山。  
江樓客恨黃梅後，村落人歌紫芋閒。  
堤月橋燈好時景，漢庭無事不征蠻。

夜無多雨曉生塵，草色嵐光日日新。  
蒙頂茶畦千點露，浣花牋紙一溪春。  
揚雄宅在唯喬木，杜甫臺荒絕舊鄰。  
却共海棠花有約，數年留滯不歸人。

渚遠江清碧簟紋，小桃花繞薛濤墳。  
朱橋直指金門路，粉堞高連玉壘雲。  
窗下斷琴翹鳳足，波中濯錦散鷗羣。  
子規夜夜啼巴樹，不並吳鄉楚國聞。

### 少華甘露寺

石門蘿徑與天鄰，雨檜風篁遠近聞。  
飲澗鹿喧雙派水，上

樓僧蹋一梯雲孤煙薄暮關城沒遠色初晴渭曲分長欲  
然香來此宿北林猿鶴舊同羣

多情

賦分多情却自嗟蕭衰未必爲年華睡輕可忍風敲竹飲  
散那堪月在花薄宦因循拋峴首故人流落向天涯鶯春  
鴈夜長如此賴是幽居近酒家

中年

漠漠秦雲澹澹天新年景象入中年情多最恨花無語愁  
被方知酒有權苔色滿牆尋故第雨聲一夜憶春田衰遲  
自喜添詩學更把前題改數聯

同志顧雲下第出京偶有寄勉

鳳策聯華是國華

顧雲著述目爲鳳策聯華

春來偶未上仙槎鄉連南

渡思菰米淚滴東風避杏花吟聒暮鶯歸廟院睡消遲日  
寄僧家一般情緒應相信門靜莎深樹影斜

長門怨二首

閑把羅衣泣鳳皇先朝曾教舞霓裳春來却羨庭花落得  
逐晴風出禁牆

流水君恩共不回杏花爭忍掃成堆殘春未必多煙雨淚  
滴閑堦長綠苔

野步

翠嵐迎步與何長笑領漁翁入醉鄉日暮渚田微雨後鷺  
鷗閑暇稻花香



偶書

承時偷喜負明神  
務實那能得底身  
不會蒼蒼主何事  
忍飢多是力耕人

郊墅

韋曲樊川雨半晴  
竹莊花院徧題名  
畫成煙景垂楊色  
滴破春愁壓酒聲  
滿野紅塵誰得路  
連天紫閣獨關情  
漢陂水色澄於鏡  
何必滄浪始濯纓

舟行

九派迢迢九月殘  
舟人相語且相寬  
村逢好處嫌風便  
酒到醒來覺夜寒  
蓼渚白波喧夏口  
柿園紅葉憶長安  
季鷹可是思鱸膾  
引退知時自古難

訪題表兄王藻洞上別業

桑林搖落渭川西  
蓼水瀟瀟接稻泥  
幽檻靜來漁唱遠  
暝天寒極鴈行低  
濁醪最稱看山醉  
冷句偏宜選竹題  
中表人稀離亂後  
花時莫惜重相攜

長江縣經賈島墓

水繞荒墳縣路斜  
耕人訝我久咨嗟  
重來兼恐無尋處  
落日風吹鼓子花

題進士王駕郊居

前山微有雨  
永巷淨無塵  
牛卧籬陰晚  
鳩鳴村意春  
時淨應寡合  
道在不嫌貧  
後徑臨陂水  
菰蒲是切鄰

曲江紅杏

江世言卷三  
遮莫江頭柳色遮日濃鶯睡一枝斜女郎折得殷勤看道  
是春風及第花

寂寞

江郡人稀便是村踏青天氣欲黃昏春愁不破還成醉衣  
上淚痕和酒痕

唐廩

廩萍鄉人乾寧元年登進士官秘書正字

楊岐山

逗竹穿山越幾村還從舊路入雲門翠微不閉樓臺出清  
吹頻回水石喧天外鶴歸松自老巖間僧逝塔空存重來  
白首良堪喜朝露浮生不足言

王穀

穀字虛中宜春人乾寧四年進士第官終尚書郎

吹笙引

嫺皇遺音寄玉笙雙成傳得何淒清丹穴嬌雛七十隻一時飛上九天鳴水泉迸瀉急相續一束宮商裂寒玉旂旒香風繞指生千聲妙盡神仙曲曲終滿席悄無語巫山冷碧愁雲雨

玉樹曲

陳宮內宴明朝日玉樹新粧逞嬌逸三閣霞明天上開靈籀振搯神仙出天花數朶風吹綻對舞輕盈瑞香散金管紅絃旖旎隨霓旌玉佩參差轉璧月夜滿樓風輕蓮舌冷

冷詞調新當行狎客盡持祿直諫犯顏無一人歌舞未終  
樂未闋晉王劍上粘腥血君臣猶在醉鄉中一面已無陳  
日月聖唐御宇三百祀濮上桑間宜禁止請停此曲歸正  
聲願將雅樂調元氣

苦熱行

祝融南來鞭火龍火旗焰焰燒天紅日輪當午凝不去萬  
國如在紅爐中五嶽翠乾雲彩滅陽侯海底愁波竭何當  
一夕金風發爲我掃却天下熱

紅薔薇歌

紅霞爛潑猩猩血阿母瑤池曬仙纈晚日春風奪眼明蜀  
機錦彩渾疑黥公子亭臺香觸人百花懔懔無精神苧蘿

西子兒應妬風光占斷年年新

刺桐花

南國清和烟雨辰刺桐夾道花開新林梢簇簇紅霞爛暑  
天別覺生精神穠英鬪火欺朱槿棲鶴驚飛翅憂燼直疑  
青帝去匆匆收拾春風渾不盡

贈蒼溪王明府文在手曰長生

執手長生在人皆號地仙水雲眞遂性龜鶴足齊年但以  
酒養氣何言命在天況無婚嫁累應拍尙平肩

逢道者神和子

珍重神和子聞名五十年童顏終不改綠髮尙依然酒裏  
消閑日人間作散仙長生如可慕相逐隱林泉

送友人歸閩

東南歸思切把酒且留連再會知何處相看共黯然  
嗟啼  
黎嶺路月白建溪船莫戀家鄉住酬身在少年

夢仙謠三首

前程漸覺風光好琪花片片粘瑤草有人遺我五色丹一粒吞之後天老

青童遞酒金觴疾列坐紅霞神氣逸笑說留連數日間已是人間一千日

瑤臺絳節遊皆遍異果奇花香撲面松窗夢覺却神清殘月林前三兩片

秋

蟬噪古槐疏葉下樹銜斜日映孤城欲知潘鬢愁多少一夜新添白數莖

王貞白

貞白字有道永豐人乾寧四年進士授校書郎

擬塞外征行

寇騎滿雞田都護欲臨邊青泥方絕漠懷劍始辭燕旌旗掛龍虎壯士募鷹鷂長城威十萬高嶺奮三千行行向馬邑去去指祁連鼓聲遙赤塞兵氣遠衝天對陣雲初上臨城月始懸風驚烽易滅沙暗馬難前恩重恒思報勞心屢損年微功一可立身輕不自憐

蘆葦



江西詩集卷三  
高士想江湖湖閑庭植蘆清風時有至綠竹興何殊嫩喜  
日光薄疎憂雨點纍驚蛙跳得過鬪雀裊如無未織笆籬  
護幾擡叩竹扶惹烟輕弱柳蘸水漱清蒲漑灌情偏重琴  
樽賞不孤穿花思釣叟吹葉少羗雛寒色暮天映秋聲遠  
籟俱叩吟應有趣瀟灑十餘株

田舍曲

古今利名路只在儂門前至老不離家一生常晏眠牛羊  
晚自歸兒童戲野田豈思封侯貴唯只待豐年征賦豈辭  
苦但願時官賢時官苟貪濁田舍生憂煎

妾薄命

薄命頭欲白頻年嫁不成秦娥未十五昨夜事公卿豈有

機杼力空傳歌舞名妾專脩婦德媒氏却相輕

湘妃怨

舜欲省蠻陬南巡非逸遊九江沉白日二女泣滄洲目標  
楚雲斷恨深湘水流至今聞鼓瑟咽絕不勝愁

長門怨二首

寂寞故宮春殘燈曉尙存從來非妾過偶爾失君恩花落  
傷容鬢鶯啼驚夢魂翠華如可待應免老長門

葉落長門靜苔生永巷幽相思對明月獨坐向空樓鑒駕  
迷終轉蛾眉老自愁昭陽歌舞伴此夕未知秋

有所思

芙蓉出水時偶爾便分離自此無因見長教挂所思殘春

不入夢芳信欲傳誰寂寞秋堂上空吟小謝詩

御溝水

一帶御溝水綠槐相蔭清此中涵帝澤無處濯塵纓鳥道  
來雖險龍池到自平朝宗本心切願向急流傾

少年行

遊讌不知厭杜陵狂少年花時輕暖酒春服薄裝綿戲馬  
上林苑關雞寒食天魯儒甘被笑對策鬢皤然

塞上曲

歲歲但防虜西征早晚休匈奴不繫頸漢將但封侯夕照  
低烽火寒笳咽戍樓燕然山上字男子見須羞

長安道

晚鼓人已行暮鼓人未息梯航萬國來爭先黃金帛不問  
賢與愚但論官與職如何貧書生只獻安邊策

### 洛陽道

喧喧洛陽路奔走爭先步唯恐着鞭遲誰能更迴顧覆車  
雖在前涸屋何曾懼賢哉只二疎東門掛冠去

### 出自薊北門行

薊北連極塞塞色晝冥冥戰地骸骨滿長時風雨腥沙河  
流不定春草凍難青萬戶封侯者何謀靜虜庭

### 從軍行

從軍朔方久未省用干戈祇以恩信及自然戎虜和邊聲  
勁白草燒色入枯河每度因看獵令人勇氣多

古悔從軍行

憶昔仗孤劍十年從武威  
論兵親玉帳逐虜過金微  
隴水秋先凍關雲寒不飛  
辛勤功業在麟閣志猶違

入塞

玉殿論兵事君王詔出兵  
新除羽林將曾破月支兵  
慣歷塞垣險能分部落情  
從今一戰勝不使虜塵生

遊僊

我家三島上洞戶眺波濤  
醉背雲屏卧誰知海日高  
露香紅玉樹風綻碧蟠桃  
悔與仙子別思歸夢釣磬

金陵

六代江山在繁華古帝都  
亂來城不守戰後地多蕪  
寒日

隨潮落歸帆與鳥孤興亡多少事回首一長吁

商山

商山名利路夜亦有人行四皓臥雲處千秋疊蘚生書燒  
籠澗黑殘雪隔林明我待酬恩了來聽水石聲

廬山

嶽立鎮南楚雄名天下聞五峰高閣日九疊翠連雲負谷  
雪猶在陰巖畫不分唯應嵩與華清峻得爲羣

終南山

終朝異五岳列翠滿長安地去搜揚近人謀隱遁難水穿  
諸苑過雪照一城寒爲問紅塵裏誰同駐馬看

題巖陵釣臺

山色四時碧溪聲七里清嚴陵愛此景下視漢公卿垂釣  
月初上放歌風正輕應憐渭濱叟匡國正論兵

曉泊漢陽渡

落月臨古渡武昌城未開殘燈明市井曉色辨樓臺雲自  
蒼梧去水從嶓冢來芳洲號鸚鵡用記禰生才

隨計

徒步隨計吏辛勤鬢易凋歸期無定日鄉思美迴潮冒雨  
投前驛侵星過斷橋何堪穆陵路霜葉更瀟瀟

白牡丹

穀雨洗纖素裁爲白牡丹異香開玉合輕粉泥銀盤曉貯  
露華濕背傾月魄寒佳人淡粧罷無語倚朱欄

述松

遠谷呈材幹何由入棟梁歲寒虛勝竹功績不如桑秋露  
落松子春深裊嫩黃雖蒙匠者顧樵採日難防

送友人南歸

南國菖蒲老知君憶釣船離京近殘暑歸路有新蟬峴首  
白雲起洞庭秋月懸若教吟興足西笑是何年

送馬明府歸山

辭秩入匡廬重修靖節居免遭黑綬束不與白雲踈送吏  
各獻酒羣兒自擔書到時看瀑布爲我謝清虛

送韓從事歸本道

獻捷靈州倅歸時寵拜新論邊多稱旨許國誓亡身馬渴



黃河凍雁回青塚春到蕃唯促戰應不肯和親

秋日旅懷寄右省鄭拾遺

永夕愁不寐草蟲喧客庭半窗分曉月當枕落殘星  
鬢髮遊梁白家山近越青知音在諫省苦調有誰聽

憶張處士

天台張處士詩句造元微古樂知音少名言與俗違  
山風入松徑海月上巖扉畢世唯高臥無人說是非

雲居長老

巖路躡雲上來叅出世僧松高半巖雪竹覆一溪水  
不說有爲法非傳無盡燈了然方寸內應祇見南能

洗竹

道院竹籊教畧洗鳴琴酌酒看扶踈不圖結實來雙鳳且  
要長竿釣巨魚錦籊裁冠添散逸玉芽脩饌稱清虛有時  
記得三天事自向琅玕節下書

庾樓曉望

獨凭朱檻亦凌晨山色初明水色新竹霧曉籠銜嶺月蘋  
風暖送過江春子城陰處猶殘雪衙鼓聲前未有塵三百  
年來庾樓上曾經多少望鄉人

送芮尊師

石上菖蒲節節靈先生服食得長生早年避世憂身老近  
日登山覺步輕黃鶴待傳蓬島信丹書應換藥宮名他年  
控鯉昇天去廬岳逋民願從行

折楊柳三首

枝枝交影鎖長門  
嫩色曾沾雨露恩  
鳳輦不來春欲盡  
空留鶯語到黃昏

水殿年年占早芳  
柔條風裏御爐香  
如今萬乘多巡狩  
路無陰綠草長

嫩葉初齊不耐寒  
風和時拂玉欄干  
征人去日曾攀折  
泣雨傷春翠黛殘

宿新安村步

浙浙寒流漲淺沙  
月明空渚徧蘆花  
離人偶宿孤村下  
永夜聞砧一兩家

倦巖

白煙晝起丹竈紅葉秋書篆文二十四巖天上一雞啼破晴雲

風呼山鬼服役月照衡薇結花江暖客尋瑤草洞深人嚙丹霞

雨後從陶郎中登庾樓

庾樓逢霽色夏日欲西曛虹截半江雨風驅大澤雲島邊漁艇聚天畔鳥行分此景堪誰畫文翁請綴文

曉發蕭關

早發長風裏邊城曙色間數鴻寒背磧片月落臨關隴上明星沒沙中夜探還歸程不可問幾日到家山

過商山

一宿白雲根時經采藥村數峯雖似蜀當畫不聞猿馬立  
溪沙淺人爭閣道喧明朝棄繻罷步步入金門

寄天台葉尊師

師往天台久長聞過石橋晴峯見滄海深洞徹丹霄採藥  
霞衣濕煎芝古鼎焦念予無俗骨頗與鶴書招

御試後進詩

三時賜食天厨近再宿偷吟禁漏清二十五家齊拔宅人  
間已寫上昇名是年初放二十五人後  
覆汰止放十五人也

春日詠梅花

靚妝纔罷粉痕新迨曉風迴散玉塵若遣有情應悵望已  
兼殘雪又兼春

江上吟晚

一葉野人舟長將載酒遊夜來吟思苦江上月華秋曉露  
滿紅蓼輕波颺白鷗漁翁如有約相伴釣中流

伍唐珪

唐珪唐末宜春人

山中臥病寄盧郎中

十年耕釣水雲間住僻家貧少往還一徑綠苔凝曉露滿  
頭白髮對青山野僧採藥能醫病樵客攜觴爲解顏空戀  
舊時恩獎地無因匍匐出柴關

寒食日獻郡守

入門堪笑復堪憐三徑苔荒一釣船慚愧四鄰教斷火不

知厨裏久無烟

上蘇使君

江西昔日推韓注袁水今朝數趙祥縱使文翁能待客終栽桃李不成行

歐陽董

董清江人昭宗時隱居山中丞相孫偓以謫官至見之歎爲神仙中人題所居曰瑞筠山

讀書臺

坐上沿江碧玉流讀書人住幾春秋塵埃青竹陰連棟風雨黃茅冷蓋頭一榻蝨魚今槁死千年別鶴舊經遊吾方曉夜遙山夢世事從今只釣舟

歐陽持

持字化基高安人天復元年進士爲太常博士昭  
宗遷洛知梁祖有異志遁歸西山楊吳時奏除左  
拾遺未幾歸田遂不起

書翠崖寺壁

迎笑堂前九節筇閒來無事得從容時聞雷護千年橘夜  
聽風傳萬壑松茅屋人家芳草合竹房僧住翠微熏一葉  
煙雨歸來晚遙聽雲間起暮鐘

孟賓于

賓于字國儀連州人天福進士後歸南唐爲塗陽  
令遷水部員外郎致仕居吉州玉笥山自號羣玉



峰叟有金鼈集

礪溪懷古

良哉呂尚父深隱始歸周釣石千年在春風一水流松根  
盤蘚石花影臥沙鷗誰更懷韜術追思古渡頭

懷連上舊居

閑思連上景難齊樹繞仙鄉路繞溪明月夜舟漁父唱春  
風平野鷗鷺啼城邊寄信歸雲外花下傾杯到日西更憶  
海陽垂釣侶昔年相遇草萋萋

公子行

錦衣紅奪彩霞明侵曉春遊向野庭不識農夫辛苦力驕  
驍踰燭夢青青

湘江亭

獨宿大中年裏寺樊籠得出事無心寒山夢覺一聲磬霜  
葉滿林秋正深

題梅仙館

仙界路遙雲縹緲古壇風冷葉蕭騷後來豈合言淹滯一  
尉昇騰道最高

題顏氏亭宇

園林蕭灑聞來久欲訪因循二十秋今日開襟吟不盡碧  
山重疊水長流

晚眺

倚杖殘秋裏吟中四顧頻西風天際雁落日渡頭人草色

衰平野山陰歛暮塵却尋苔徑去明月照村鄰

獻主司

那堪雨後更聞蟬溪隔重湖路七千憶昔故園楊柳岸全家送上渡頭船

宋齊邱

齊邱字子嵩世爲廬陵人父誠爲洪州副使遂家焉楊吳時累官右僕射平章事南唐先主代吳以齊邱爲丞相同平章事尋出爲鎮南軍節度中主嗣位召爲中書令顯德末放歸卒

陪遊鳳皇臺獻詩

嵯峨壓洪泉岑客撐碧落宜哉秦始皇不驅亦不鑿上有

布政臺八顧背城郭山蹙龍虎健水黑螭蟠作白虹欲吞  
人赤驥相搏擲盡棟泥金碧石路盤繞塙倒挂哭月猿危  
立思天鶴鑿池養蛟龍栽桐棲鸞鷟梁間燕教雛石罅蛇  
懸殼養花如養賢去草如去惡日晚嚴城鼓風來蕭寺鐸  
掃地驅塵埃翦蒿除鳥雀金桃帶葉摘綠李和衣嚼貞竹  
無盛衰媚柳先播落塵飛景陽井草合臨春閣芙蓉如佳  
人迴首似調謔當軒有直道無人肯駐脚夜半鼠窸窣天  
陰鬼敲啄松孤不易立石醜難安著自憐啄木鳥去蠹終  
不錯晚風吹梧桐樹頭鳴噪噪峨峨江令石青苔何淡薄  
不語興亡事舉首思眇邈吁哉未到此褊劣同尺蠖籠鶴  
羨鬼毛猛虎愛蝸角一日賢太守與我觀橐籥往往獨自

語天帝相唯諾風雲偶不來寰宇銷一略我欲烹長鯨四  
海爲鼎鑊我欲取大鵬天地爲燂繳安得生羽翰雄飛上  
寥廓

贈仰山慧度禪師

初聞如自解及見勝初聞兩鬢堆殘雪一身披斷雲道應  
齊古佛高不揖吾君稽首清涼月蕭然萬象分

廖匡圖

匡圖字贊禹虔州人湖南馬氏辟幕下爲天策府  
學士與劉昭禹李宏皋徐仲雅蔡昆韋鼎釋虛中  
齊已俱以文藻知名

九日陪董內召登高

祝融峯下逢嘉節相對那能不怡神  
烟裏共尋幽欄菊樽前俱是異鄉人  
遙山帶日應連越孤雁來時想別秦  
自古登高盡惆悵茱萸休笑淚盈巾

贈泉陵上人

暫把枯藤倚碧根禪堂初創楚江濱  
直疑松小難留鶴未信山低住得雲  
草接市橋牛笛近日銜村樹鳥行分  
每來共憶曾遊處萬壑泉聲絕頂聞

松

曾於西晉封中散又向東吳作大夫  
濃翠自知千古在清聲誰道四時無  
枝柯偃後龍蛇老根脚盤來爪距粗  
直待素秋搖落日始將凡木闢榮枯

廖 凝

凝字熙績虔州人匡圖弟初隱衡岳後與馬希弼  
同遷金陵授水部員外郎出爲建昌令終江州團  
練副使與李建勳爲詩友江左學詩者多造其門

中秋月

九十日秋色今宵已半分孤光含列宿四面絕纖雲衆木  
排疎影寒流疊細紋遙遙望丹桂心緒正紛紛

聞蟬

一聲初應候萬木已西風偏感異鄉客先于離塞鴻日斜  
金谷靜雨過石城空此處不堪聽蕭條千古同

彭澤解印

五斗徒勞漫折腰三年兩鬢爲誰焦今朝官滿重歸去還挈來時舊酒瓢

沈彬

彬字子文高安人唐末應進士不第浪跡湖湘與僧虛中齊己爲詩友仕楊吳爲秘書郎以吏部郎中致仕年八十餘南唐中主召見賜粟帛

入塞

苦戰沙門臥箭痕戍樓閑上望星文生希國澤分偏將死奪河源蒼聖君爲覩敗兵眠白草馬驚邊鬼哭陰雲功多地遠無人紀漢閣笙歌日又曛

塞下



塞葉聲悲秋欲霜寒山數點下半竿映霞旅鴈隨疎雨向  
磧行人帶夕陽邊騎不來沙路失國恩深後海城荒胡兒  
向化新成長猶自千回問漢王

貴主和親殺氣沉燕山閑獵鼓聲音旗分雪草偷邊馬箭  
入寒雲落塞禽隴月盡牽鄉思動戰衣誰寄淚痕深金釵  
謾作封侯別勞破佳人萬里心

月冷榆關過鴈行將軍寒笛老思鄉貳師骨恨千夫壯李  
廣魂飛一劍長戍角就沙催落日陰雲分磧護飛霜誰知  
漢武輕中國閑奪天山草木荒

秋日

秋舍砧碎擣斜陽笛引西風墮氣涼薜荔愁烟籠蟋蟀  
菱

荷翻雨潑鴛鴦當年酒賤何妨醉今日時難不易狂腸斷  
舊遊從一別潘安惆悵滿頭霜

金陵雜題

王氣生秦四百年晉元東渡浪花船正慙海內皆塗地來  
保江南一片天古樹著行臨遠岸暮山相亞出微烟千征  
萬戰英雄盡落日牛羊食野田

暮潮聲落草光沉賈客來帆宿岸陰一笛月明何處酒滿  
城秋色幾家砧時清曾惡桓溫盛山翠長牽謝傅心今日  
到來何物在碧烟和雨鎖寒林

麻姑山

紺殿松蘿太古山仙人曾此話桑田閑傾雲液十分日已

過浮生一萬年花洞路中逢鶴信水簾巖底見龍眠我來  
遊禮酬心願欲其怡神契自然

### 題蘇仙山

眼穿林罅見郴州井里交連側局楸味道不來閑處坐勞  
生更欲幾時休蘇仙宅古煙霞老義帝墳荒草木愁千古  
是非無處問夕陽西去水東流

贈王定保

定保光化中及第異子華侍郎以子妻之  
子華卽世定保南遊湖湘無北歸意吳女  
假緇服自長安來謁白於馬殷  
全引見於佛寺吳隔簾請之

仙桂曾攀第一枝薄遊湘水阻佳期臯橋已失齊眉願蕭  
寺行逢落髮師廢苑露寒蘭寂寞丹山雲斷鳳參差聞公  
已有平生約謝絕女蘿依覓絲

結客少年場行

重義輕生一劍知  
白虹貫日報讐歸  
片心惆悵清平世  
酒市無人問布衣

再過金陵

玉樹歌終王氣收  
鴈行高送石城秋  
江山不管興亡事  
一任斜陽伴客愁

都門送別

岸柳蕭疎野荻秋  
都門行客莫回頭  
一條灞水清如劍  
不爲離人割斷愁

弔邊人

殺聲沈後野風悲  
漢月高時望不歸  
白骨已枯沙上草  
家

人猶自寄寒衣

孫魴

魴字伯魚南昌人從鄭谷爲詩仕楊吳爲宗正郎  
與沈彬李建勳友善

甘露寺

寒暄皆有景孤絕畫難形地拱千尋險天垂四面青畫燈  
籠鴈塔夜磬徹漁汀最愛僧房好波光滿戶庭

題金山寺

萬古波心寺金山名目新天多剩得月地少不生塵過鰲  
妨僧定驚濤濺佛身誰言張處士題後更無人

楊柳枝詞

靈和風暖太昌春無線播絲向昔人何似曉來江雨後一行如畫隔遙津

暖傍離亭靜拂橋入流穿檻綠陰搖不知落日誰相送魂斷千條與萬條

芳草

何處不相見烟苗捧露心萋萋綠遠水冉冉在空林野吹閑搖澗遊人醉臥深南朝古城裏碑石又應沉

秋苔

底物最牽吟秋苔獨自尋何時連夜雨疊翠滿松陰湘岸荒祠在吳宮古砌深侯門還可惜長被馬蹄侵

李徵古

徵古宜春人南唐昇元末舉進士第官樞密副使

除本州刺史

登祝融峯

欲上祝融峯先登古石橋盤開巖嶮處取路到丹霄

李匡堯

匡堯豫章布衣

謁朱齊邱

時齊邱喪了

安排唐祚挫強吳盡見先生說廟謨今日喪雛猶自哭讓  
王宮春合何如

江西詩徵卷三